

Na osnovu člana 19. Zakona o mikrokreditnim organizacijama ("Službene novine Federacije BiH", broj 59/06), čl. 5. stav (1) tačka h) i 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj 75/17), člana 12. stav (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj 03/18), Upravni odbor Agencije za bankarstvo Federacije Bosne i Hercegovine, na sjednici održanoj 15.04.2025. godine donosi

ODLUKU
O IZVJEŠTAJIMA KOJE MIKROKREDITNA ORGANIZACIJA DOSTAVLJA
AGENCIJI ZA BANKARSTVO FEDERACIJE BOSNE I HERCEGOVINE,
NAČINU I ROKOVIMA IZVJEŠTAVANJA

Član 1.

Predmet

- (1) Ovom odlukom propisuje se obaveza mikrokreditne organizacije (u daljnjem tekstu: MKO) da dostavlja Agenciji za bankarstvo Federacije Bosne i Hercegovine (u daljnjem tekstu: Agencija) izvještaje u svrhe:
 - a) nadzora nad poslovanjem MKO, za potrebe efikasnog provođenja nadzora u skladu sa propisima kojima se reguliše poslovanje i nadzor MKO u Federaciji Bosne i Hercegovine (u daljnjem tekstu: FBiH),
 - b) statističko-informativne prirode, za potrebe provođenja propisanih nadležnosti sa ciljem utvrđivanja i provođenja aktivnosti i mjera radi očuvanja i jačanja stabilnosti mikrokreditnog sektora FBiH, saradnje sa domaćim i međunarodnim institucijama, tijelima i institucijama koje vrše nadzor, izvještavanja o poslovanju i analize stanja mikrokreditnog sektora u FBiH.
- (2) U skladu sa stavom (1) ovog člana odredbama ove odluke propisuju se vrste izvještaja koje MKO dostavlja Agenciji, te način i rokovi izvještavanja Agencije.
- (3) MKO u smislu odredaba ove odluke je mikrokreditna fondacija (u daljnjem tekstu: MKF) i mikrokreditno društvo (u daljnjem tekstu: MKD).
- (4) Ova odluka primjenjuje se na MKO sa sjedištem u FBiH kojima je Agencija izdala dozvolu za rad i organizacione dijelove MKO sa sjedištem u Republici Srpskoj i Brčko Distriktu koja ima registrovane organizacione dijelove u FBiH.
- (5) MKO sa sjedištem u FBiH dužna je dostavljati sve izvještaje propisane ovom odlukom.
- (6) MKO sa sjedištem u Republici Srpskoj i Brčko Distriktu koja ima registrovane organizacione dijelove u FBiH, dužna je dostavljati Agenciji izvještaje iz člana 2. stav (1) tač. a), k), l), o) i s) ove odluke, u rokovima utvrđenim u članu 4. st. (1) i (2) ove odluke.
- (7) Svi organizacioni dijelovi MKO iz stava (6) ovog člana, sa stanovišta izvještavanja u skladu sa ovom odlukom, smatraju se jednim organizacionim dijelom, te se dostavljaju zbirni podaci za sve organizacione dijelove registrovane u FBiH.

Član 2.

Izvještaji

- (1) MKO je dužna Agenciji dostavljati mjesečne i kvartalne izvještaje:
 - a) Izvještaj o ponderisanim nominalnim i efektivnim kamatnim stopama po mikrokreditima (obrazac MKO: Kamatne stope);
 - b) Izvještaj o gotovinskim transakcijama od 30.000,00 KM ili više, povezanim i sumnjivim transakcijama (obrazac SPNiFTA - Tabela A);
 - c) Izvještaj o sumnjivim klijentima (obrazac SPNiFTA - Tabela B);

- d) Izvještaj o strukturi doniranih sredstava MKF (obrazac MKF: struktura doniranih sredstava);
 - e) Lista najvećih dioničara za MKD (obrazac MKD: kapital T-1);
 - f) Lista najvećih ulagača u MKD - d.o.o. i osnivača MKF (obrazac MKD-d.o.o. i MKF: kapital T-2);
 - g) Bilans stanja MKD (obrazac: BS-MKD) i bilans stanja MKF (obrazac: BS-MKF);
 - h) Bilans uspjeha MKD (obrazac: BU-MKD) i bilans uspjeha MKF (obrazac: BU-MKF);
 - i) Izvještaj o izračunu prilagođenog povrata na aktivu i operativnu efikasnost (obrazac MKO: AROA i OE);
 - j) Lista najvećih izvora sredstava (obrazac MKO: izvori);
 - k) Sektorska i ročna struktura mikrokredita (obrazac MKO: SiRS);
 - l) Izvještaj o visini i načinu formiranja rezervi za pokriće kreditnih gubitaka (obrazac MKO: rezerve);
 - m) Izvještaj o svim ponovo ugovorenim mikrokreditima MKO (obrazac MKO: RK);
 - n) Izvještaj o ponovo ugovorenim mikrokreditima MKO u kvartalu (obrazac MKO: RK-Q);
 - o) Izvještaj o otpisanim mikrokreditima, naplati otpisanih mikrokredita i trajnom otpisu (obrazac MKO: otpisi (A) i (B));
 - p) Izvještaj o likvidnosti (obrazac MKO: Likvidnost);
 - r) Izvještaj o svim transakcijama s licima ili grupom povezanih lica sa MKO (obrazac MKO: Povezana lica);
 - s) Izvještaj o broju i kvalifikacionoj strukturi zaposlenih (obrazac MKO: zaposleni);
 - t) Izvještaj o otplati mikrokredita na teret jemaca (obrazac MKO: OKJ);
 - u) Izvještaj o izračunu koeficijenta održivosti poslovnog modela (obrazac MKO: KOPM, obrazac MKO: KOPM (a): Izračun održive izloženosti po osnovu aktivnog portfolija, obrazac MKO: KOPM (b): Izračun održive izloženosti po osnovu otpisanih mikrokredita).
- (2) MKO ne može mijenjati oblik i sadržaj propisanog obrasca izvještaja iz ove odluke, te je u obavezi izvještaje popunjavati u skladu sa uputstvima za popunjavanje izvještaja.

Član 3.

Način izvještavanja

- (1) MKO je dužna izvještaje iz člana 2. stav (1) ove odluke dostavljati samo elektronski putem informacionog sistema Agencije, a izvještaje iz člana 2. stav (1) tač. d) do u) ove odluke, pripremljene na osnovu konačnih podataka na izvještajni datum 31.12. i u papirnoj formi, pri čemu isti trebaju biti potpisani od strane nadležnih lica MKO i ovjereni pečatom MKO.
- (2) MKO je dužna internim aktima definisati najmanje dva lica koja će biti nadležna za ovjeru odnosno potpisivanje izvještaja, od kojih u slučaju MKD najmanje jedno lice mora biti član uprave, a u slučaju MKF direktor ili lice koje ima privremeno ovlaštenje od direktora za ovjeru i potpis izvještaja (u slučaju odsustva direktora).
- (3) Izvještaje iz člana 2. stav (1) tač. d) do u) ove odluke usvaja organ upravljanja MKO (upravni odbor / nadzorni odbor).
- (4) Uz izvještaje iz člana 2. stav (1) tač. d) do u) ove odluke koji su pripremljeni na osnovu konačnih podataka na izvještajni datum 31.12., MKO je dužna dostaviti i obrazac Opći podaci i pregled izvještaja (obrazac: MKO-FBA), potpisan od ovlaštenih lica u skladu sa odredbama iz stava (2) ovog člana, kojim se dokazuje da su izvještaji prihvaćeni od strane organa upravljanja MKO (upravni odbor / nadzorni odbor).
- (5) MKO je dužna podatke i informacije u izvještajima iz ove odluke prikazivati tačno i potpuno, vodeći računa o međusobnoj usklađenosti podataka u izvještajima.
- (6) Agencija može, u rokovima koje utvrdi u svakom posebnom slučaju, tražiti od MKO da dostavi izvještaje u papirnoj formi na bilo koji izvještajni datum, a koji će biti potpisani od ovlaštenih lica i ovjereni pečatom MKO.

Član 4.

Rokovi izvještavanja

- (1) MKO je dužna izvještaje iz člana 2. stav (1) tač. d) do u) ove odluke dostavljati Agenciji kvartalno do kraja narednog mjeseca po isteku kvartala, a za prethodnu godinu pripremljene na osnovu preliminarne podataka do 31. januara tekuće godine i za prethodnu godinu pripremljene na osnovu konačnih podataka do 5. marta tekuće godine.
- (2) MKO je dužna izvještaj iz člana 2. stav (1) tačka a) ove odluke dostavljati Agenciji mjesečno u roku od 15 kalendarskih dana nakon isteka izvještajnog mjeseca, a izvještaje iz člana 2. stav (1) tač. b) i c) ove odluke, mjesečno u roku od deset kalendarskih dana nakon isteka izvještajnog mjeseca.
- (3) Ako su rokovi za dostavu izvještaja iz ovog člana subota, nedjelja ili praznik, rokovi se pomiču na prvi sljedeći radni dan.

Član 5.

Donošenje i objavljivanje uputstava

- (1) Direktor Agencije će u roku od 60 (šezdeset) dana od dana stupanja na snagu ove odluke donijeti uputstva iz člana 2. stav (2) ove odluke, kojima se detaljnije propisuju obaveze MKO u pogledu izvještaja koje je dužna sačiniti, odnosno propisuje se sadržaj, forma i način popunjavanja izvještaja iz člana 2. stav (1) ove odluke.
- (2) Sastavni dio uputstava iz stava (1) ovog člana su izvještajni obrasci iz člana 2. stav (1) ove odluke i isti se objavljuju na službenoj internet stranici Agencije.

Član 6.

Primjena važećih uputstava

Do donošenja i primjene uputstava iz člana 5. ove odluke, primjenjivat će se uputstvo propisano Odlukom o izvještajima koje mikrokreditna organizacija dostavlja Agenciji za bankarstvo Federacije Bosne i Hercegovine i rokovima izvještavanja („Službene novine Federacije BiH“, broj 87/19 i 85/23) sa pratećim obrascima, koje je važno na dan stupanja na snagu ove odluke, a koje nije u suprotnosti sa ovom odlukom.

Član 7.

Prestanak važenja odluke

- (1) Danom početka primjene ove odluke prestaje da važi Odluka o izvještajima koje mikrokreditna organizacija dostavlja Agenciji za bankarstvo Federacije Bosne i Hercegovine i rokovima izvještavanja („Službene novine Federacije BiH“, br. 87/19 i 85/23).
- (2) Do dana početka primjene ove odluke MKO je u obavezi Agenciji dostavljati izvještaje u skladu sa odlukom iz stava (1) ovog člana.

Član 8.

Stupanje na snagu

Ova odluka stupa na snagu osmog dana od dana objavljivanja u "Službenim novinama Federacije BiH", a primjenjuje se počev od izvještavanja sa finansijskim datumom 30.06.2025. godine.

Broj: U.O.-33-03/25
Sarajevo, 15.04.2025. godine

PREDSJEDNICA
UPRAVNOG ODBORA

Ivanka Galić, dipl.ecc., s.r.